



BSN lulus 273 permohonan Skim Perumahan Belia bernilai RM69.25 juta

Putrajaya: Sehingga bulan lalu, 273 permohonan pinjaman perumahan menerusi Skim Perumahan Belia diluluskan Bank Simpanan Nasional (BSN) membabitkan pembiayaan RM69.25 juta.

Timbalan Menteri Kewangan Datuk Chua Tee Yong berkata, kerajaan pada Bajet 2015 mengumumkan pelaksanaan Skim Perumahan Belia dengan menyasarkan 20,000 pasangan belia di seluruh negara.

Beliau berkata, BSN adalah perbankan tunggal yang dilantik bagi melaksanakan skim berkenaan yang memberi tawaran kepada pasa-

ngan belia memiliki hartanah pertama bernilai antara RM100,000 hingga RM500,000.

“Kerajaan menyasarkan kelulusan pembiayaan perumahan RM1 bilion menjelang akhir tahun ini menerusi skim ini.

“Justeru, kita berharap lebih ramai pasangan belia berkahwin yang berusia antara 25 dan 40 tahun serta mempunyai pendapatan isi rumah di bawah RM10,000 memohon skim ini,” katanya.

Hadir sama, Naib Presiden dan Ketua Jabatan Strategi Korporat BSN, Kameel Abd Halim.

Katanya, skim itu ditawarkan berdasarkan konsep ‘siapa cepat dia dapat’ bagi pasangan berpendapatan isi rumah di bawah RM10,000 dan ia menawarkan insentif RM200 sebulan selama dua tahun.

Tee Yong berkata, skim yang dilaksanakan secara perkongsian pintar antara kerajaan bersama BSN, Kumpulan Wang Simpanan Pekerja (KWSP) dan Perbadanan Gadaai Janji Nasional (Cagarmas Berhad) itu membolehkan pemohon mengeluarkan Akaun 2 KWSP bagi menampung ansuran bulanan dan kos lain, selain pengecualian 50 pe-

ratus duti setem ke atas surat cara pindah milik dan perjanjian pinjaman.

“Selain tawaran pembiayaan 100 peratus yang tidak memerlukan pemohon layak membayar deposit, kerajaan juga turut menyediakan jaminan pinjaman 10 peratus bagi mendapat pembiayaan penuh termasuk kos insurans,” katanya.

Kameel berkata, proses permohonan pinjaman BSN hanya mengambil masa seminggu dan pihaknya mempergiatkan lagi promosi melalui 401 cawangannya di seluruh negara supaya lebih ramai belia mendapat manfaat daripada skim itu.